

Famia Ling ta lansa e buki:

Ling Legacy a journey of Family, Food and One Happy Island

TABATA diabierna atardi 9 di juli, na Papiamento Restaurant den un ambiente ideal, cu solo bahando, biento fresco suplando despues cu un poco awacero a cay riba Aruba, cu famia Ling hunto cu un grupo chikito di invitado a reuni pa lansa e buki; Ling Legacy a Journey of Family, Food and One Happy Island.

Sharlene Starke yiu muher di Yolanda Ling q.e.p.d. a conta di e origen di e buki y di e fundacion; Jordan Ling Foundation na cual tur fondo recauda por medio di benta di e buki lo bay.

“E idea pa scirbi y publica e buki a nace serca mi tanta sra. Ingrid Ling casa di mi tio Clifton. E intencion tabata prome pa haci e un publicacion priva pa famia, p’e keda como un recuerdo pa tur miembro di famia cu ta of tabata parti di e legado di e famia Ling, pues un family book,” asina Sharlene a conta.

Sinembargo na 2015 mientras cu sra. Ingrid tabata bezig cu e draft, e famia a ser enfrenta cu un dolor devastador. Su primo Jordan, yiu di Clifton y Ingrid lamentablemente a tuma su mesun bida a consecuencia di su sufrimento di deficiencia mental. Asina na 2016 a lanta “The Jordan Ling Foundation” pa promove actividadnan relaciona cu Salud Mental. E meta principal ta pa yuda mas tanto posibel promove cuida di personanan cu ta sufri di Salud Mental aki na Aruba. Despues sr. Clifton Ling, kende hunto cu su rumannan a tuma over e negoshi di su mayornan a conta di e historia di yegada di su famia for di China na Aruba na 1930. Tabata durante di e decada 1920 cu China tabata un republica nobo, despues di 2000 aña di dominio imperial. E pais tabata enfrentando enorme retonan cu nan economia, politica y bida social.

China a keda devasta pa un guerra civil entre Kum Ming Tong (KMT) encabesa pa Chang Kai Shek y e Partido Comunista Chines (CCP) bao mando di Mao Zhe Dong, cual doctrina a prevalece te cu awe. Segun e censo di e tempo ey, China tabata conta cu un poblacion di solamente mei miyon habitante. Den e decada ey China a conoce un periodo di hambruna causa pa chaos politico y un segura immenso.

“Mi Papa a nace den e aldea chiquito di Leelong cu awe ta un barrio di e metropolis Shenzhen, e ciudad fronterizo entre Hong Kong y China. Siendo e yiu mayor di un famia di 10 yiu, e tabata esun cu a wordo encarga pa haci e biahe pa exterior cu e speranza pa un logra mihor futuro, asina el a descubri Aruba.

Sr. Clifton Ling a sigui conta durante di su discurso cu e caminda pa realisa e buki tabata basta turbulento pa motibo di e tragedia di nan yiu homber menor Jordan,



pa kende nan ta dedica e obra di e buki y tambe pa e fundacion bao su nomber.

Un danki ta bay na nos yiu homber Dustin y su grupo di amistad di Caribe Hulandes biba na New York - Big Apple cu a establece contacto cu e editor y publicista Willy Wong kende tabatin gran conocimiento di e material y aceso n’e archivonan universitario den e region. Asina nos por a compila e historia di mi grandinan, e biahe, e documentonan y potretnan cu ta sichroniza cu e texto skirbi den e buki. E ta simplemente un storia di un imigrante cu kier a busca su futuro sin conocimiento kico esaki lo trece den un mundo nobo aki na otro banda di e laman immenso.

Un danki special ta bay na tur persona y instancianan cu a contribui den cualkier forma cu por a conduci den e logro aki awe. Manera mi a menciona prome, e buki ta dedica na JLF y e fondonan recauda aki ta bay p’e fundacion. E prome ehemplar di e buki a ser entrega na Director di Archivo Nacional drs. Raymond Hernandez, e bukinan lo ta obtenibel den librerianan local. Nos ta spera cu e comunidad di Aruba les’e y goza di dje!